

Wie allerley entzündung vnd Brand der Schäden / vnd Wunden zuleschen ist.

Nemmet weiße Lillen-Wurzel / lassets in Aschen braten / dann Geiß-Inselet / alt schmer / Tauben-Ratt / vnd ein wenig Wachs / auß diesem allem eine Salbe gemacht / vnd auff die entzündte Wunden gelegt ; diese Salbe ist auch sehr heylsam wann ein Pferd mit heissem Wasser gebrent worden.

Wann ein Pferd am Herzen Gebrechen hat.

S dieses Ubel ein Pferd anstosset / helt es den Kopff nider / hat trüb Augen / eingefallene Seiten / die Schenckel lauffen ihm auff / vnd wird traurig / beisset vnd naget sich selbst am Leib / diesem Ubel muß man mit hitzigen Sachen begegnen / vnd ihm selbe durch das Maul / vnd durch die Nasen-Löcher beybringen. Nemmet Pfeffer / vnd guten Wein / Meer-Swifel / werffets dem Pferd in den Schlund / vnd in die Nasen-Löcher / dann nemmet Lorbeer zerstoßet sie zu Pulver / vnd besträet dem Pferd den Haber darmit / vnd füttert ihn ; aber seyet darvor / daß ihm kein frisches Wasser gegeben werde / dann das brächte ihm grossen Schaden / man soll es auch warm im Stall halten / vnd mit hitzigen Sachen berauchen.

Wann ein Pferd die Schaff-Drüesen hat / vnd ihme der Vnflat auß der Nasen fließet.

Diese Kranckheit erkennet man / wann es auff den hindern Füßen matt ist / kan sich nit recht darauff halten / gehet weit auß einander / vnd will sich vberall anlainen / der Harn ist roth wie Blut / es geschwillet ihm das Maul / vnd Geschröt / die Augen seyn Dunckel / vnd kan sie nit recht auffehen / vnd im gehen setzet es einen Fuß vber den andern auß Mattigkeit / vnd gehet daher / als ob es truncken wäre / derowegen muß man ihm den Kopff / den Ruck-Grad / vnd die Kinbacken mit linden Salben schmieren / die ihm den Schmerzen wegtreiben / es wol zudecken / damit es fein warm habe / vnd ihm solche Sachen zuessen geben / die ihm den Harn reinigen / vnd die Erkältung wegnemmen : Als Fenichel sambt dem Kraut / mit Pimpernell / vnd gestossener Myhrren vermengeset / vnd die helfft einsieden lassen / solches dem Pferd in den Hals geworffen / wol zugedecket / vnd darauff hin vnd wider geführet / so kommts zurecht.